



KIERÄŠ

majebargâ • 3.10.2011 • nummeer 1

Toimâtteijest

Kierâš algá oppeet almostuđ. Ulmen ličij almostittiđ loostâ aainâs-uv taan ive loopân. Toimâtemvyehi lii suullân siämmáš ko ovdil-uv, peic viermist Kierrâš sajan almottemuállin lii uásild puáttám Facebook já anarâš wiki, Nettisaje. Nuuvtpa keččâlep vuáijuđ ain eenâb jieš siskáldâsân: tevstáid já kuvviđ.

Na láá-uvks mist ubâ mainâsehkin Kierâččân? Ko mun koiđâdim fáddâjurduid *anarâš orroomvisteest* Facebookist, te uánihis ääigi siisâ fáádáh lijii čoggâšum oovtâ páappáraarkâ tievâ. Anarâš maailmist kustoo tábáhtuvá ennuv. Tom tuše ij táátu huámmášiđ, ovdilgo sáttoo teivâđ tagarij ulmuiguin, kiäh láá tietimin.

Kierâččân uázžu čäällid kii peri, kote anarâškielân čáálá. Ton lasseen mun juádhám freelancer-toimâtteijen já keččâlâm čokkiđ loostâ aainâs-uv kuohtii mánuppaajeest mut mielâstubboht jyehi oho.

Petter Morottaja

Taan loostâst:

- Sämitige vaaljâin monnii maŋgâ anarâš čoodâ
- Anarâš ehideh juátkojeh aainâs-uv ive loopân
- Anarâš luovisjuávkku raahtij kozzsäplig-fiilmâ
- Párnáikirje Muštottes uárree lii almostum

Sämitige vaaljâin monnii manjâ anarâš čoodâ

Sämitige vaaljâin adelum jienah rekinistuvvojii vuossaargâ já majebaargâ koskâsii iijâ. Tiggepaje 2012-2015 uddâ Sämitige jesânij juávhust láá ennuv ulmuuh aanaarsämmilij suuvâst. Taan tove meiddei anarâškielâliih iävtukkâsah piergejii viehâ pyereest.

Čoodâ peessâm anarâšah láá Anu Avaskari, Yrjö Musta, Anna Morottaja, Heikki Paltto já Pentti Valle. Ton lasseen Pekka Pekkala lii väärrin. Uddâ anarâš jesânij Yrjö Musta já Anna Morottaja sárnuv meiddei anarâškielâ,

já máhđulávt kevttiv tom puátteevuodâst Sämitige čuákkimijn já eres ohtâvuodâin.

Vaaljâi jienâháarááv lâi Tiina Sanila-Aikio, kote finnij 148 jiennâd. Nubben enâmustáá jienâid čokkij Klemetti Näkkäljärvi, 142 jiennâd. Ohtsis jienâsteijeeh lijji suullân 2500 já jienâstemprosent lâi 49,6%.

Uddâ Sämitigge aalgât pargoos puáttee ive. Talle sij väljeje koskânis saavâjođetteijee já čuákkejeh jieškoteuv lävdikuudijd, moh valmâšteleh aášijd Sämitige čuákkimij várás.

Anarâš ehideh juátkojeh aainâs-uv ive loopân

Taan ive Säämi máttááttâskuávdáš lii ornim anarâš ehidijd, moh láá olášum suullân ohtii mánuppaajeest. Anarâš ehideh láá lamaš teivâdmeh, moi ääigi anarâšah pyehtih teivâđ, sárnuđ anarâškielâ já puđâldiđ siämmást maidnii hitruid. Ovdeláá taan ive teivâdeijeeh láá jo kuálástâm, čuággâm kuobbârijd, ráhtám koškepuško (mut iä vala puurrâm tom), iäge tast vala puoh.

Taan ive ehidijd lii ornim Suvi Kivelä. Sun lii koordinistám jyehi ehidân stivrejejee, kii vist vuáváá ton eehid ohjelm. Suvi maainâst, et ehideh láá kiäsuttâm uáli pyereest ulmuud. Suu rekinistmij miel ehidijn láá iällám suullân 50 sierânâs olmožid, maanğas

tiäduš-uv täävjib-uv ko oovtâ ehidist. Ulmuuh láá puáttám Avelist já motomin Njellimist-uv, mii lii Suvi mielâst eromâš pyeri. Vaigâdis äšši lii lamaš finniđ tiäđu ehidijn jyehi sajan. Tiedettem oro puárránmin tääl ko loppâive ehidijn lii tiätu meid Inarilainen-loostâin.

Puáttee ivveest ij lah vala tiätu, et juátkojeh-uv ehideh. Máttááttâskuávdáást sátáččij vala kavnuđ ruttâ, mut taam eehidtooimâ puávtáččij väldiđ pargosis meid Anarâškielâ servi. Jyehi tááhust jis iäljárís vuávájeijeeh láá, te ehidij orniimist uáli tehálâš ličij ohtâ teikkâ muáddi ulmuu, kiäin láá “puoh lääigih kiedâinis”.

Loppâive ehideh láá suullân kuohtii mánuppaajeest. Čuávuvááh anarâš ehideh láá:

- 11.10. Muusikeehid Anarist SMK Lassekuádist. Jođettejee Anna Morottaja.
- 25.10. Mááccuheehid Njellim servitáálust. Jođettejee Teija Linnanmäki.
- 8.11. Puáris čuovâkoveh já mainâseh SMK Avveel toimâsaajeest (Väöldi kuvviđ fáárun!). Jođettejee Ilmari Mattus.
- 22.11. Salmâeehid Avveel kirho vyelikeerdist. Jođettejee Tuomo Huusko.

Ehideh láá ain majebaargâ tme 18-20.

Lasetiäduid fáálá Suvi Kivelä (puh. 050 337 5603)

Anarâš luovisjuávkku raahtij kozzsäplig-fiilmâ

Anarâškielâ servi lii ornim jo mangâ ive luovistooimâ škovlâlijd já motomin meid vuálá škovlâahasijd. Mii lii taan keesi puáđus? Tot lii *Kozzsäpligij rávhu*, uánihis fiilmâ kozzsäpligijn. Fiilmâ tyehilokke maainâst, et kozzsäplig lii kale rávhuttum ellee, mut ij ollágin rávhálâš. Taan elleekove keččee piäsá tiettiđ, et mondiet kozzsäpligeh vuolgii jotteeđ já mii tast maŋa tábáhtui.

Porgemáánu luovis stivrejejee Suvi Kivelä iätä, et luovis luhostui pyereest, veikkâ huáppu kale lâi: kietâčaalâ já kuvvim tábáhtui kyevti peeivist, ige fiilmâ čuoppâmângin tađe kuhheeb kevttum. Luovisliih keksejii fiilmâ

fáadá keččâmáin olgos laasâst. Taan ive kozzsäpligeh láá lamaš tuotâ valjeest. Suvi rámmoo sii luovisviste Viinti, mii lii Aanaar škovlâin siämmáá rakânâsâst.

Fiilmâ lii jo muádi DVD:st, mut uástiđ taid kale ij pyevti. Suvi lii áigumin ornid vuosáeehid fiilmâ várás – teikkâ jis ohtsâšibárdâs lii, te kozzsäpligehhân sätth peessâđ veikkâba Youtuben.

Taan keesi luovisliih lijii Ester Olthuis, Matti Rodgers, Olivia Paadar, Pessi Koskinen, Saammâl Rodgers, Saammâl Suominen, Eemi Kiviniemi já stuárráb uásivâlden Sofia Olthuis já Heli Huovinen. Kovvejejee já čyeppee lii Joonas Saari.



Uđđâ párnáikirje Muštottes uárree lii almostum

Saammâl lii nuorâ anarâš kaandâš, kote lii kavnâm nuáidiruumbu suu pääihi ääitist. Mut lahtâ ääitist sierâdijnis sun kolmuuttij jieijâš já puosâškuođij. Toos-uvks tot ilo nuáidiruumbust nuuvâi? Veikkâ sun lii kumeštâsâst já nuorvust, te liijká Saammâl váldá nuáidiruumbu suin fáárun seengân. Tom tom tom, rumbu iätä...

Lee Rodgers párnáikirje *Forgetful Squirrel* – *Muštottes uárree* almostui taan ive čohčâmáánust. Almostittemtilálâšvuotân Kultahovin lijji puáttâm kyevtlov sulâin olmožid kuldâliđ saavâid kirjeprojektist. Kirjeest láá hitruus mainâs lasseen ivnekoveh, maid Lee lii jieš sárgum. Kirje lii kuástidâm Anarâškielâ servi já ruttâdmist válduiššeen lii lamaš Säämi kielâ-lävdikode.

Lee čaalij mainâs vistig engâlâskielân, ko tot lii suu eenikielâ. Maŋeláá Anarâškielâ servi ornij Säämi kielâ-lävdikode ruudâin mainâs jurgâlem anarâškielân. Tondiet ko maainâs ij lah

almostuđ engâlâskielânin kosten, te kirjeest šoodâi kyevtkielâlâš: maainâs lii luuhâmnáál sehe engâlâskielân já anarâškielân. Kielah láá paldâluvvâi, vâi taid puávtáččij verdidid kuáimâsis.

Kirje lii finnimnáál anarâškielâ kielâpiervâlijn teikkâ njuolgist Anarâškielâ servi čällest (adai Petterist, ohtâvuotâtiäđuh loostâ loopâst). Anarâškielâ servi vuábdá kiirjijid hoddijn 20 e / pittá. Kirje lii kavnâmist meiddei om. Sámi Duodjist já Siijdâst. Tobbeen tot sáttá leđe váhá tivrâsub.

Luvvâ puátteš Anarâš-loostâst, maid Lee arvâlij kirje čálimist!



Kierâš lii Anarâškielâ seervi ry. kuástidem tiädättâslostâ. Loostâst vuolgâttuvvoo pááppárversio tiilájejeid, já ton lasseen loostâ puáhtá luodid̄ tai luuhâđ Internetist.

Kierâš váldá vuástá čalluid já kuuvijd äigikyevdilis tábáhtumijn. Toimâttejei puáhtá iävtuttid̄ meiddei fáddájurduid.

Toimâttejee Petter Morottaja
+358 45 23 55 395
petter.morottaja@gmail.com